



JUDICIAL SYSTEM MONITORING PROGRAMME  
PROGRAMA MONITORIZASAUN BA **SISTEMA JUDISIÁRIU**

*Komunikadu Imprensa  
Tribunál Distritál Baucau  
02 Dezembru 2014*

**Rezolusaun PN no Governu kontinua afeita produtividade no normalidade funzionamentu  
iha Tribunál Distritál Baucau**

Iha 27 Novembru 2014, Tribunál Distritál Baucau tenke adia prosesu julgamentu ba kazu krime violasaun seksuál ho agravasaun ne’ebé involve arguidu JX hasoru nia oan rasik (insestu). Kazu ne’e akontese iha 12 Maiu 2014, iha Suku Tiriloka, Sub-distritu Baucau, Distritu Baucau.

Julgamentu ne’e adia tanba tribunál seidauk distribui kazu refere ba juis foun hodi hala’o prosesu julgamentu atu troka juis titular ne’ebé antes ne’e prezide hosi juis internasionál. Infelismente juis ne’e tenke husik hela kazu ne’e tanba afetadu hosi Rezolusaun PN no Governu iha 24 no 30 Outobru 2014, fulan ida liu ba.

Antes ne’e, iha dia 4 no 5 Novembru 2014, JSMP publika ona komunikadu imprensa ida relasionala ho konsekuenta hosi Rezolusaun PN no Governu ne’ebé intrudus hodi halo auditoria ba setór justisa no hapara imediata autór judisiáriu internasionál sira iha Tribunál, Ministériu Públiku no asesor iha Komisaun Anti Korupsaun (KAK).

“JSMP fiar katak rezolusaun ne’e sei kontinua afeita produtividade no normalidade julgamentu iha tribunál sira, tanba to’o agora seidauk iha soluasaun apropiadu ba situsaun ne’e, depois rezolusaun ne’e ezekutadu,” dehan Diretor Ezekutivu JSMP Luis de Oliveira Sampaio.

Partikularmente iha kazu ne’e, JSMP hanoin katak krime ho forma violasaun seksuál ne’ebé involve membru família rasik (insestu) nu’udar kazu grave no ofende teb-tebes vítima nia integridade umana. Iha kazu ne’e alende vítima sai vítima ba ema ne’ebé tuir loloos tenke proteze nia, vítima mós tenke simu konsekuenta hosi desizaun político ne’ebé la sukat ho realidade iha tribunál sira.

Julgamentu ne’ebé adia ba tempu naruk sei afeita kualidade no rezultadu final husi kazu ne’e. Bele iha justifikasi saun oi-oin, purezemplu, vítima lakon esperansa ba prosesu ne’e la’o la klaru no kleur, material evidencia bele lakon ka kontaminadu, vítima haluha faktu importante sira kona-ba kazu ne’e no iha ikus vítima lakon konfiansa ba tribunál prosesu ne’e la’o la ho serteza.

Iha kazu ne'e, vítima no testemuña sira tenki lakon tempu, gastu ba transporte no aihan to'o iha tribunál atu kumpri notifikasi saun tribunál hodi tuir julgamentu. Maske nune'e, prosesu ne'e tenke adia sein hetan informasaun antes hosi tribunál relasiona ho impedimentu ne'e.

Aleinde ne'e, arguidu ne'ebé agora daudaun detidu hela iha prizaun preventiva ne'ebé akompañadu hosi guarda prizoneiru hosi Prizaun Becora Dili ba to'o iha Tribunál Distriál Baucau, maibe julgamentu tenke adia.

JSMP rekomenda ba instituisaun kompetente sira atu fó atensaun sériu ba kestaun ne'e atu asegura katak prosesu julgamentu bele funsiona hanesan normal atu nune'e sosiedade kontinua tau konfiansa ba iha justisa formal.

Adiamantu ba kazu ne'e, anunsia hosi juis Dr. Hugo da Cruz Pui, Ministériu Públiku reprezenta hosi Dr. Luis Hernanio Rangel da Cruz no Dr. Juvinal Yanes hosi Defensória Públiku.

Atu hetan informasaun kle'an liután favór kontaktu:

Luis de Oliveira Sampaio

Diretor Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone: 3323883 | 77295795

Website: [www.jsmp.tl](http://www.jsmp.tl)

Facebook: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPtl